

四庫全書

集部

欽定四庫全書

集部

彭城集卷十七至二十

詳校官庶吉士臣馬履泰

檢討臣何思鈞覆勘

總校官進士臣程嘉謨

校對官編修臣朱紱

謄錄監生臣鍾拔元

欽定四庫全書

彭城集卷十七

宋 劉攽 撰

七言長律

送王相公

白麻詔出鳳凰池
金節銅符副錫珪
故事周公不之魯
是行山甫亦徂齊
百年禮樂更禱机
萬國車書載狄鞮
開闢乾坤容海運
幹回樞極寄杓攜
故都形勝餘龍虎

開府文章盛璧奎列坐諸生親絳帳縱談禪伯得金篦
四山嵐氣連松梓二水波濤亂鼓鼙里老傍車看畫鹿
江靈低首避燃犀鴻河帶地長餘潤蟠木開花亦有蹊
躍冶空慙折鉤喙在鈞仍似落巢泥苦心刻鵠纔成鶩
卑意函牛祇洎鷄早晚重開丞相閣為公羸馬踏沙隄
和楊褒早春二首

雪色留寒風弄和新陽淺淺故陰多池冰漸盡泉初潔
徑草猶微菊未莎歸鴈聲音矜久客晴雲意態似妖娥

杖藜窮巷貧非億隱几衡門嘯也歌身外閒愁從撥棄
眼前詩景得遮羅亦知白髮非春事老伴相尋奈我何
少年意氣屬時和春入青門樂事多試著青衫迎暖日
閒騎駿馬踏青莎御風直欲從仙子奔月猶能及素娥
鴈鶩陂前來膾鯉芙蓉園裏去聽歌舞狂相屬揮如意
醉起馳歸擲巨羅寄語子雲天祿閣新書尚白竟如何

寄齊州李學士并呈蘇密州

濟水由來徹海清兩州偕得水南名遺人頗記睢陽曲

原註 濟陰
本分 梁國

說士猶談歷下兵碧落羽翰俱失路白頭章

綬偶專城東秦表海知君重左輔陪京莫我輕賓客此

邦多長者

原註 漢語云
梁多長者

詩書前古聚諸生不知高密何

如彼試仗西風問子卿

送王兗州

卧閣偏州獨老夫三年化盡白髭鬚故人始得班荆語
督府相觀剖竹符舊學翰林君子澤雄文策府列仙儒
蛟龍莫作池中物老驥幾為轅下駒腰底印章馳傳乘

道傍冠蓋棄關繻黃金上冢家相樂文弩迎官吏疾驅
甲子可憐同步武光陰稍覺近桑榆掛車正爾思前路
畢娶由來異壯圖笑謔會須矜此酒分飛何必待長塗
側身東望艱梁甫猶冀君家有隻鳬

次韻宋職方新修廳事

事從梁棟拯隳頽民有餘工庫有財不待公輸洎玉蘭
肯論新甫與徂徠經營結構無遺巧壯麗宏深要必該
廣砌水平鋪淡碧應門風過絕纖埃雲山噴墨文屏合

金獸銜環洞戶開勢似名翬飛天矯喜知巢燕到裴徊
陳平社宰非無意薛惠郵亭信不才會道曹風如魯衛
輔州元作帝京陪

再和宋職方

萬緣冥數有興頽不為勞民與費財常怪丘淵猶改舊
足令著蔡可知來黃圖左輔今仍重甲令名藩此正該
過去英賢聯踵武幾多能事悉塵埃僦工匠石三農隙
唾手公堂一旦開妙選棟梁虹宛轉觸新廊廡雁徘徊

落成幸有羔羊酒能賦欣逢錦繡才衰老專城無異術
祇將勤拙任家陪

次韻酬李推官

少無風力致雲霄老寄東藩愧節旄涉境已憐清濟涸
開門猶喜岱山高智微黑蟻穿珠竅術異游魚出鬲膏
思古循良深自歎視身尸素欲何逃流光去去車馳轂
遇事新新海駕濤屈指家聲歡上客愜心風什幸詩豪
青春小圃饒佳卉遲日芳樽付濁醪傾蓋強君留一醉

相看前路鈞連鰲

答鄭秘丞見寄長韻

鄭公真率故難攀
夙昔相期季孟間
畫錦鄉閭嗤拓落
藉糟官局壓清閒
飲腸縱逸卮無當
詩句清新玉作環
屢舞自矜能舉袖
少歌誰復顧酡顏
南金不足償棊進
魯酒頻聞輸罰鍰
豪忤里儒連束矢
狂侵醉尉欲翹關
婢勤織衽幾無欲
男飽詩書僅有鰥
疲馬踏泥如得絆
弱弓支肘不成彎
權材未恨原中秘
領邑那知寄百蠻

說將正憐胡越異問津空復鬢毛斑江連楚蜀無窮水
路繞巴渝不盡山青嶂叫猿寒寂寂亂泉衝石暝潺潺
有生誰得辭羈旅良苦遙知冒險艱高興由來向人盡
尺書仍喜不吾慙

雨後小園

雨多三逕似荒郊處處秋陰紫翠交照水白蓮霜雪朶
倚天喬木夕陽梢池光俯見游魚窟樓角遙臨宿羽巢
倚杖移時看蟻鬪操舟繚岸試杯膠牆陰靜色憐甘菊

垣上懸藤識苦匏老圃不須譏抱壘野人無事件誅茅

五言絕句

終南山

終南際滄海千里張屏風落月沈山西朝陽生嶺東

火浣壇

天游神不虛火解形復見明明學道心不與劫火變

許真君祠

舊怪神仙事燕齊得浪傳丹青此堂上想像為依然

酒舫

美酒留人飲乘風縱客槎
秋潭夜深月春嶼雨餘花

竹岡

魚緣映層阜蒼翠復春苔
君知愛霜雪若个是龍材

寒食後聞雁

後雁來何暮春風萬里情
江南多燕子無處覓同聲

丹井

古井玄泉色仙人玉鏡寒
照來知骨相作意就金丹

初夜

栖雞已登屋宿羽復歸林
不語聽鐘坐默默千里心
郡樓晚坐同陳掾

雲來湖外雨樓倚樹梢風
不惜清涼意持將與子同
人日立春

花勝已宜春剪綵更為人
風光今日好顏貌一時新
送韓玉汝司封奉使兩浙聞諸公先分題用池塘
生春草園柳變鳴禽字合為十章章四句

赤驥脫鼻羈軒然視瑤池公持漢使節不減豸冠時
三江亘東南波浪浮日光峽中起奔濤積錢僅成塘
吳帆若飛鴻千里長風生組練白玉粒一月來上京
利銜析秋毫心計遊無垠亦有甘棠蔭蔽芾如舊春
忽為嚴霜誅慘戚動秋草狐狸不足問豺狼詎橫道
諸公惜分手置酒倚名園長廊蔽修景晝無車馬喧
露光洗高花風力曳垂柳上客請賦詩主人起為壽
春濃芳菲雜日夕境氣變望望檣上烏去去令人羨

壯年吳會遊常有懷遠情想見瓜步南草長鶯亂鳴
驛騎傳梅花書牒封來禽何以慰別愁遲此瑤華音

花嶼

孤絕池心嶼高低水面花若無舟楫到應似隔仙家

池上

罷客棊仍在留書卷未終荷喧知過雨萍聚見來風

嘯臺

高臺見百里長嘯海風生為問塵埃耳能聞鸞鶴聲

鼎池

仙去遺金鼎年深認劫灰懷人何限意時向鼎池來

故人謝師厚刻唐賢淳于先生墓詩于善謔驛系
語其後刻石後二年師厚去世明年余過善謔驛
讀詩悲之因作淳于墓詩又題二韻追悼師厚平
生忘形善謔莫逆惟師厚為然也

故人墳宿草翰墨想遺風善謔知君意何傷睿武公
與持國約游環溪大風不果往又過曾氏值主人

之病

人事不如意出門安可期終須賞春物那問主人為

蓮池

蓮花水底紅荷葉岸邊風五月蟬鳴後君應愛此中

東樓

樓前淮水上遠樹似魚鱗來帆與去櫂腸斷倚欄人

長門曲

凝笳來鳳輦玉宇開深殿君恩春風迴那向秋時怨

君心似明月月缺應再圓但令黃河水到海還上天

書堂對雪

幽居遠人境竹柏映吾廬滿目山林意今晨霰雪初
積風寒玉折驚鳥落花餘定有麝麝迹環林未掃除

雨後回文

綠水池光冷青苔砌色寒竹幽啼鳥亂庭暗落花殘
旅舍不寐作回文四句

定雲浮黑月驚風觸巢鳥暝燈客單寢短夢恨遲曉

彭城集卷十七

欽定四庫全書

彭城集卷十八

宋 劉攽 撰

七言絕句

勤道堂

西秦公子樗名里南楚真仙漆種園誰顧世人大笑
偶題勤道志忘言

初暑馬上

負弩前呼地起塵炎風烈日正隨人暫投茅舍支拳坐
却是從前倦客身

荆扉茅屋水平流竹簟蒸盤局未收無用詢他名與姓
忙閒有分不相投

臧孫御叔悉名卿飲酒何妨傲雨行未似驅車日當午
敢嫌高士笑勞生

貝州亂二首

軍書羽騎曉紛紛兵起清河一日聞多少衣冠盡塗地

憑高依約見妖氛

金印他時恩澤侯
專城意氣凜生秋
軍中成敗如翻水
空使明堂旰食憂

遊章運判園亭

自有林亭不種花
總將春色寄鄰家
桃紅梅白須尋得
暮去朝來不算賒

客舍栽花欲為主
出門騎馬即天涯
何時置得尋常地
管領春風屬自家

旅館

滿月還成破鏡飛，流螢清露夜依依。
弄兒看織無窮樂，

咫尺嵩雲不得歸。

原註鮑昭詩云弄兒戲床頭看婦織中織

九藥芙蓉

托根不近芙蓉苑，移植猶依瘴癘鄉。
並藥連心九相似，看來還使九回腸。

九月吉日澗上望芙蓉，因尋菊今歲特晚青。
藥未作憮然有懷。

百芳不奈秋風急
唯有芙蓉特拒霜
本以南州積炎德
一為名悞客殊方

寄闕西兄弟

曉風吹盡淮南雪
昨夜汀洲白芷生
遙想春光西北去
倩傳相憶向秦城

閶闔臺

原註予所居在宋門城下城脅有平地可
方丈餘去地一丈以上每登之以眺遠近

兒童因戲

曰閶闔臺

看雪望春何處好
城腰山腹暫來登
人知容足無餘願

便是章華與九層

紅日駸駸還暗夜輕車去去只微塵老夫獨立聊觀化
驚怪往來無限人

納涼明教臺

臺上井泉水冷滑城隅川色劒光芒多慙薄領相寬假
全得南風一日涼

梅雨

梅實初黃暮雨深寶刀生鏽鏡昏沈年年卑濕身無病

自覺能勝百鍊金

隱語三首呈通判庫部

梧上生枝復隔年
白頭傾蓋兩歡然
滿城童子垂髫髮
竹馬羊車戲路邊

邯鄲度曲盡新聲
稚萼韶華稍向榮
珠箔曲鈎遮密坐
瑤臺靜室伴深行

宮柳飛花暗度春
斛愁容貯奈傷神
曼聲試作鷄鳴曲
何必陽關無故人

新開湖上待潛珠不出偶書戲孫莘老二首

貝闕藏珠安在哉九淵深絕若為媒風波可畏且歸去
漫道扁舟湖上來

合浦因人去不還隋侯未值報恩年欲憑泉客傳微信
夜久涼風月滿川

入汜水寄仲馮

沙起河津迷積霧雲遮晚日怯層山客行正似擣菹局
疊馬來過第二關

新燕

主人恩厚與相依
畫棟危簷畫啟扉
豈是有心希鵠鴈
衆雛成就即歸飛

出都

王孫蓮勺鹵中困
文叔蕪蕪亭下寒
塵俗豈知湖海士
敝裘羸馬出長安

致齋太常寺以杖畫地成二首

少有閒人訪寂寥
薄雲淡日早春朝
庭花弄藥萱生笋

時見東風趁柳條

杖藤為筆沙為紙閒立庭前試草書無奈春風猶掣肘
等閒撩亂入衣裾

寧陵陂

十里菰蒲百頃陂秋風嫋嫋蕩連漪
旅遊已信江湖遠水國猶將畫夢疑

屈鉤結網老農妻鼓櫂鳴榔舊牧兒
世事誰令山海變可憐機械亦相隨

長春花

雪霜雨露平分盡
舊紫新紅次第開
自是餘花芳意薄
那知春去不重來

次子由韻三首

流霞飲過已忘寒
和筆螭坳墨色乾
溫室前頭問名木
此身知不悞儒冠

四朝傳說直臣言
萬事多君與輕軒
重到彤墀揮翰處
想知雲夢一時吞

華光勸講想天臨白髮儒先遇主心仍寄史臣揮直筆
聖謨文思與幾深

泊淮上

風波繚繞半天下鬢髮蒼蒼一丈夫惆悵江湖向時月
又來淮浦照檣烏

久旱作問詩

問雲何意復歸山應恃無心欲占閒我為閒多忙折我
勸雲為雨莫空還

問風何意掃雲開
本為虞琴喚汝來
桑麥青乾天不雨
更將何物阜民財

問山何意及郊農
天欲為霖不見容
少閉土囊誅嘯虎
也教雲氣得從龍

遣悶二首

好飲本來身少事
徒歌非是曲彌高
若能全療詩書癖
用底聊均筆硯勞

草荒三徑尋常綠
樹掩雙扉丈尺高
燕語不如鶯語靜

蜂飛猶勝蝶飛勞

感懷

澤雉呼雌日出飛林鴉失子夜深啼勞生未盡無生理
外境移心不得齊

題館壁

壁門金闕倚天開五見宮花落古槐明日扁舟江海去
却從雲氣望蓬萊

末伏

火流漸近桑榆上秋氣新從閭闔來每歲長安猶暑熱
內官相屬賜冰回

題湛上人院畫松

水墨乍成巖下樹摧殘半隱洞中雲猷公會住天台寺
陰雨猿聲何處聞

儒生

為儒自分多迂闊已老那能更改張青史異時傳信事
不為民賊坐投荒

題荊林館

深山雨過氣清潤四月居人猶袂衣獨坐空庭看喬木
黃鶯語歇繞枝飛

西湖獨行

畫橋朱閣水東西柳帶花梢聳復低欲上扁舟還借問
此中時有晉人迷

種梧桐

鳳鳥非梧不息陰梧桐非鳳亦無禽種桐階祀有深意

欲伴幽人介獨心

種花

種花栽藥一番新
閒繞芳叢到日曛
莫笑人情不開豁
事曾經手自殷勤

湖口阻風

風波迂直路何限
雲水淒涼秋向高
百里淹留還信宿
可堪殘日看驚濤

長蘆阻風

萬頃寒濤浸日車
迅風重疊浪成花
雲深不辨江靈事
時見奔駒走岸沙

阻風

愁思橫江不易堪
惡風終日自西南
逐臣那有回天力
請謝蜚廉亦未甘

寒江常歲起條風
今日檣烏悉向東
定有江神欺放逐
更添留滯作途窮

寄張十二

先進多於貧賤隔故交時有死生分數疑吾子更名字
將謂平生又失君

寄閣下諸同舍

春風過盡欲無餘天祿花英玉不如閉戶清臺誰累汝
正應歸舍悉焚書

寄丁元珍

南海飛鴻北海鳬青冥相望羽翰孤虛弓祇是弦聲急
不向雲霄墮九鳥

蔡州路中作五首寄都下

案放以疾求如蔡州故詩中有病餘清骨鬢成

霜之

句

病餘清骨鬢成霜
慚負腰間郡組長
等是君恩容卧治
淮西何必減淮陽

雨濕城南輦路沙
歸鞦韆蹠喜還家
病軀復作南州守
空使離憂兩鬢華

南城十里短長亭
三月煩君復送行
道上垂楊猶可折
秋風蕭索不須驚

病指拘攣不自如
平居畫諾亦躊躇
雙魚欲寄諸親故
安得陳遵憑几書

朱輸駟馬錦障泥
郡守官儀足品題
自是老身無宿分
卧乘簞舁一雞棲

寄孫巨源

裊裊柔芳淺淺春
早梅花白柳條新
歸艤去後無來客
占得風光不共人

居鄰渤澥接江湖
間數春風鴈與鳬
乘鴈來歸隻鳬起

未應言有復言無

東門城壁踐胸山此去蓬萊一望間
潛有真仙自來往
秦人何用不開關

九宮祭畢寄陳五

三百六旬齋復齋東城騎馬獨歸來
秋風黃葉驚人面
徑向君家就酒杯

寄金山朝陽巖僧

松篁倚石夜露滴樓閣緣巖風鐸高山
僧入定晝不起

頂上潮音翻海濤

寄胡完夫時罷河東提刑知蔡州予亦罷京東轉
運使知兗州

懸車束馬太行道取魯并齊七十城今日朝恩俱卧閣
故人應得老人情

次韻和望嶽亭詩

連逢七十二重山芝朮潛通小有天自笑何須僊者笑
未忘軒冕顧金錢

望嶽亭前一凭欄秋雲蕭索水光寒
北人解道衡山遠此地衡山已背看

雪後行小園

一尺春泥頻側足半池天水欲清神
柳黃梅白貪迴首驚起啼鵲雪灑人

水仙花

早於桃李晚於梅冰雪肌膚姑射來
明月寒霜中夜靜素娥青女共徘徊

題餞送亭

還有柳枝能送客而無桂樹解留人
離腸冉冉隨征旆
愁絕江南日暮春

竹雞

慣聽巴山杜鵑哭飽聞湘岸鷓鴣啼
濃雲細雨黃昏暮
竹外傳呼滑滑泥

致齋雨中寄王彥祖

倚城喬木半參天雨過交流百道泉
始覺太常齋不惡

秋風靜裏雨蕭然

細草幽花七月天
曲溝藪石亂鳴泉
齋居三日遺塵事
夢寂神凝亦自然

曉晴入薦福院

日照庭除上下光
雪殘喬木碧蒼蒼
空無烏雀隨人語
散漫風煙駐佛香

雪中羣僚聚飲

衰老歡娛總強為
興闌蕭索不無悲
任教年少相縱樂

聽說勝於主席時

次韻酬傅欽之

風力清和日景遲
看花未醉莫言歸
殊方長恨故人少
白髮那論春事非

新雁

水生巴峽春始秀
葉下洞庭秋已高
去鴈來鴻多少日
羈人搔首看江濤

出長蘆口

濤翻鷺羽連天白山疊屏風到海青客路浮生兩如寄
萬重波裏一浮萍

秋雪過相國寺

六花飛舞滿長安古寺樓臺白玉攢長眉老僧見客語
兩年秋雪就中寒

女貞花

巴婦能專利丹穴始皇稱作女懷清此花即是秦臺種
赤玉燒枝擅美名

小雨

烈風呼洶震山林
小雨霏微駐薄陰
南畝旱苗焦欲死
擬將如許號為霖

野次

麥苗出隴漸漸綠
花樹迎風淺淺紅
欲就白楊傾一酌
竟無人可暫相同

聞王深甫下第

驂騑歷塊誤顛蹶
卞子抱璞空歸來
天下何曾識琬琰

市人空復尚駑駘

送刁節推歸江南此君辟孫并州幕府府罷遂棄

官

長平幕府可張羅誰見當時賓客多還有任安如砥柱
故山歸卧恣顏波

中軍高韻拂雲霓世路能將寵辱齊君去可無離合恨
不應流涕悵睽攜

馮當世湖西口占還舟中却寄

落日回船煙水明殘霞黯黯共離情南飛多少江鳬翼
好倩檣鳥徧寄聲

次韻錢四

衰老常嫌帶減圍那堪髀肉厭征騑東山仍有周公夢
也恐三年始得歸

嶽雲亭

四更捧日輪囷勢千里為霖黻黻功但道無心是真意
任辭幽石起封中

許州西湖觀音像

孤絕佗山碧海濱
天花水月靜無塵
客槎不載支機石
為見閒遊得度身

遊俞氏園亭

花外鞦韆柳下門
東城近處辟疆園
樓頭明月終歸去
更為殘陽盡酒尊

晝眠

薰風四月樹陰合
無事高眠晝漏長
覺後已疑人世改

起看林影上東牆

嘲畫眠

利名苦厭茲多口
朝市那能盡信書
一枕涼風雲滿目
民謠民訟不關渠

芙蓉池

風搖羽扇露盈盤
卷卷翻翻欲定難
醉眼波心歡有遇
水仙傾蓋正相看

湖口

三日湖雲不肯晴
四山冥晦與川平
繫船汀樹無人語
卧聽波濤瀕洞聲

清溪物色亦消憂
風雨何辭有滯留
定似湖邊釣魚客
一生家事託孤舟

本自悠悠物外人
每逢山水為情親
慙愧湖波淹客棹
到官不畏上官嗔

送傅推官

武仲高材筆不休
相逢傾蓋復離憂
黃河赤鯉強三尺

他日無煩數置郵

和丘直講除字韻

橫經童子一趨隅擁篲門人為掃除
遲暮不知稽古力
正憐桑戶欲捐書

斷水詞

楚客斷水行苦難清音愁絕逼人寒
憑君與製水仙操
傳入湘靈寶瑟彈

雨後池上

一雨池塘水面平
澹磨明鏡照簷楹
東風忽起垂楊舞
更作荷心萬點聲

過周修撰池

絕景淹留欲斷年
曉來冰雪漲池泉
盡拈書籍無多子
來問東家亦漫然

貂裘

季子高談萬乘前
黃金白璧等虛捐
貂裘敝盡風霜苦
却憶周南二頃田

夜坐

獨坐吟詩到四更
牆根蟋蟀近床鳴
涼風閃閃吹燈滅
默坐無言直到明

新晴

青苔滿地初晴後
綠樹無人晝夢餘
唯有南風舊相熟
逕開門戶又翻書

朝陽升空天氣新
荒郊落葉寒紛紛
溪源流潦不可渡
知是蜀山前日雲

次韻和陳五詠張侍郎小車

富貴於人疑疾顛名儒華髮獨蕭然
小車何必邱園事不記千秋始姓田

履及階除杖及園攢車閒暇過前村
老農未喻疏公意應怪虛高駟馬門

桂花

月中丹桂昔誰栽經歲光華十二回
正似此花多意思一番紅過一番開

遊環溪

赤日紅塵幾悔來
垂楊綠水眼先開
踏花酌酒到佳處
把釣臨流始此回

漾漾溪流碧照天
荇絲荷葉小如錢
容易白魚時掛網
挿生幽鷺肯回船

向景亭

四野川原多秀色
非因向著不能知
置亭高爽時來望
自此風光更屬誰

雨後東園

雨後重來春更深
梅花似雪柳如金
青天白日鶯雀語
杳杳歸鴻風外音

蠻請降三首

漢軍誅蠻蠻遁走
漢使約降蠻稽首
天威若日照四海
殺人得賊亦何有

官軍萬人宿山下
百姓避兵多曠野
秋來雨足荊棘生
鄰里無復歸耕者

縣官斬敵予金帛健兒見賞不見賊聞道殺人多老農
至今過客猶悽惻

自古

自古邊功緣底事多因嬖幸欲封侯不如直與黃金印
惜取沙場萬髑髏

漢約無功不得侯姦雄惡少善為謀却令驕主輕人命
奴僕行師海北頭

龍山

西城門外龍山路乘興來遊不厭頻後日重陽須一醉
青松繫馬菊留人

果園巷訪楊寺丞

原註果園本
高氏遊宴所

馬出城門小徑斜廢園故國總堪嗟曲池平盡喬木老
舊地分張百姓家

考試畢登銓樓

春雲濃淡日微光雙闕重門聳建章不上樓來知幾日
滿城無算柳梢黃

登樓

城外園林非一主
春風總總為開花
遊蜂語燕隨人眼
過盡南家與北家

陳州雜詠

歷說諸侯七十餘
絕糧桑落尚歡娛
不容而後知君子
方笑南冠駕乘駒

鄭莊推士古無倫
置驛諸郊日日新
去病魏公俱改節
一生惆悵杜陵人

固安功次異蕭陳深怪材官亦致身高卧閉箝天下口
不憂聖主責愚臣

黃橙寄黃翁

江南碧樹映霜秋丹實清香破客愁常恨忌辛消俗口
為評蠲憤詫齊州

將過孔處士莊聞處士往許昌不果往

鹿門隱士肯浪出荷蓀丈人行不逢朝陽晝雨霽復暝
香山無路雲重重

和原甫謁武信殿

紫氣東迎太一峯
翠華飛御獵回中
玄女授符開上策
河宗獻寶告成功

願借前籌敢決疑
幹回天地聳當時
舊傳太尉條侯策
今見宣王六月詩

望廬山

蒼山去郭三十里
日暮雲收獨立時
應是塵埃能眯眼
幾人曾有望山詩

次韻和王待制絕句

病軀何處識君恩，卧治無令四體勤。
客誦舍人詩句好，幾將筆硯一時焚。

無年何日蘇凋瘵，死市空嗟費杖笞。
舊尹告新應有意，若為閒暇得遊嬉。

蔡邕倒屣貴公子，阮籍清談林下游。
人事差池不如古，祇將朱墨繼為州。

寄韓玉汝待制

南雲不到飛狐口朔雪來從累鴈門
仗節仍煩鑿空使
乘槎徑取濁河源

嫖姚不復顧家為誰謂東山久未歸
卷耳幸容携婉孌
皇華何啻有光輝

秋盡野次

丹椒結子菊花黃山路秋高草木香
日出鷄鳴下喬樹
人來犬吠透疎篁

湖水彌天未覺秋暫辭鞍馬寄扁舟
菰蒲無禁魚無稅

誰似溪翁得自由

彭城集卷十八

欽定四庫全書

彭城集卷十九

宋 劉攽 撰

制誥

皇叔祖右監門衛大將軍彭州刺史克艱可遙郡

團練使制

考課之法周之外朝公族支屬以親授祿非取勤民之
效而被陟明之典我朝惇叙之恩是其為大矣某進列

環衛兼領郡符積其歲月之勞加以團練之號宜思自修以稱成命

皇伯右監門衛大將軍祁州團練使仲真可選郡防禦使皇伯右監門衛大將軍榮州團練使仲某可叙復選郡團練使

江夏王宗室之英地近屬尊茲而遺言後嗣為念朝廷方以惇叙興治哀榮並施爾等率循嚴訓皆習謙冲遷遷寵榮以示優渥仲真進秩一等團

原註一作周

禦大郡仲

某其思罔愆復益勉勵母墜休命

皇兄右武衛大將軍普州刺史士躬可遙郡團練

使制

朝廷隆親之愛戚疎莫不受位緣賢賢之義勤奮咸
使進秩惇叙之典有自來矣具官某地聯具邇屬居則
友身修足以無過家治是以為政內參環衛外領州團
十稔于茲三秩維叙俾假使麾之重進居團練之雄幕
府如初符章加峻益思恪慎以若寵光

皇兄右武衛大將軍常州刺史令琮可依前右武

衛大將軍遙郡團練使制

環尹大將軍之幕府郡將二千石之符節是為榮寵實
待材用國家崇惇叙之典隆其適之愛不恡高爵而畀
公族至于歲久仍以課選是其親親源源之美異于前
古矣惟令琮謹身無曠有足稱者因宿衛之舊守增團
練之峻秩祇服休命毋忘恭恪

朝散郎集賢校理崔公度可兵部郎官制

憑能分虎外則連城之寵含香握蘭內則建禮之直皆以材選是為美仕某文行自將勞伐夙著出守千里既有成最入司五兵實副遴東祇服休寵益勵恪居

戶部員外郎劉昱可戶部郎官制

臺郎之選朝所慎東雖甚清望猶以州郡為其資叙所以均內外之任而示以民事為先也爾以材敏課最聯職省部有司第其閎闊當為牧守正爾郎秩以示漸進位著祿餼悉加于舊祇服光寵益崇職業

皇伯右武衛大將軍深州團練使叔兼防禦使制
公族之恩殊于外朝高爵重祿不待兵戎之績陟明進
秩仍以歲月之務我朝惇叙之美邁于前古爾持身無
過久次當遷進加禦侮之右不移環衛之重膺是休渥
毋忘恪修

皇伯右金吾衛大將軍舒州防禦使仲革皇伯右
金吾衛大將軍開州防禦使仲洽可並正任防禦
使制

國家繇祖廟之慶廣公族之恩雖不治民隆其爵秩至
于積日兼為閎閱爾等皆以近屬齒于顯位備執金環
尹之列領剖符外禦之寄謹身無曠馴行有聞宜豫陟
明用疇結課因其舊治遂爾為真惟此寵光奚以報效
貴而能降滿焉不溢勿渝素心對越休命

皇伯右金吾衛大將軍和州防禦使世程可正任
防禦使制

執金環衛之列防禦守帥之貴崇是品秩以待材用汝

磐石之宗葛藟攸庇粵膺寵數允協惇叙仍以年勞復從吏課公族之恩軼邁前世然非修身慎行遠於咎戾何以保茲祿位而進豫陟明連城之廣正任為重恩稱殊渥益自勉勵

皇叔右武衛大將軍和州防禦使仲汾霸州防禦使仲爰並可正任防禦使制

朝廷推親親之愛厚於公族故不憐高爵重祿雖無殊功成效猶使之躡等循級而進也然非馴行惇謹素守

堅正亦何以綿厯歲月無所玷缺考績之際姑有以藉
口矣爾等皆以近屬驟膺寵數環衛大將軍之班列郡
防禦使之號既兼之矣復以年勞進為正任國恩隆厚
屬籍光顯宜思恪慎以永終譽

皇叔右監門衛大將軍舒州團練使仲郵可右武
衛大將軍遙郡防禦使制

內參環衛外領使符名實兼副寵祿輝赫朝廷所以待
材用之宅而公族緣親親而處之仍以汎恩得與外朝

比列此其博博叙廣愛之至也其官某地居近屬身有
嘉稱聯門衛之幕府總羣舒之團結緣飛龍之在御當
進爵以均慶遽罹親憂弗俟恩錫既終達禮宜申前令
吏右武之貴秩增禦侮之重權懋服光華益思恪慎

皇兄故右監門衛大將軍令駟可贈博州防禦使
制

傳云親親以睦治族之道生則致其愛沒則同其哀豐
祿重爵厚其生者也愍冊襚服飾其終者也朝廷之恩

備矣有司之事舉矣皇兄某地居近屬身有馴行奄至
不淑良用傷悼假使麾之美號為壞戶之餘榮魂其有
知歆此殊寵

皇叔右武衛大將軍環州刺史叔滕可遥郡團練
使皇叔右千牛衛將軍仲馨可授大將軍制

百官奉事由功實以為資級公族論恩在久次則當遷
叙此朝廷治內外之法本忠厚之意也具官叔滕天潢
之別漸漬德潤麟趾之世信厚有取備官環衛兼刺名

郡既積年勞宜加爵秩假雄稱於團結資威望於使領
勉服光寵益勵名節仲馨備官環衛貴視命卿既積年
勞宜加爵秩不移幕府之號姑假元帥之寵勉服休命
益勵名節

皇叔右監門衛大將軍滁州團練使仲猷可遙郡
防禦使皇叔右監門率府率府仲璵可右千牛衛將
軍制

公族之恩戚疎有叙存著賞延之典沒隆卹後之儀以

乃父遺顧而有言矜諸子貌露而為請因從加秩以慰
泉下奔駒過隙既就外除維柝疏榮肇推新命咸思恪
慎以報義方

皇叔右監門衛大將軍仲的可右武衛大將軍遙
郡刺史皇叔太子右監門率府率仲歲可小將軍

制

朕纘嗣昌業覃慶列位小大之臣莫不受賜矧其屬在
公族可使後於庶姓而爾等皆以親憂弗俟成命既給

達禮宜申前寵或進躋武衛而領郡符或身列環尹而
備幕府敬服異數益修善行

皇叔右武衛大將軍袁州刺史仲遠可遙郡團練
使皇叔右監門衛大將軍叔羅可遙郡刺史制

吾以材能賦爵而宗室以戚屬處位吾以功事課吏而
公族以年勞計最治親之禮異于外朝所以崇惇叙之
典厚而勿薄雖然宗子之能畏慎無過其亦有信厚之
風蒙被寵數不為濫矣仲遠備位環尹外領州符稍加

團結之名以示遷擢之次叔羅備位環尹既開幕府稍假左符之重以示專城之貴祇服休命毋怠恪居

右監門衛大將軍士出士蒲令括捐之士編可並
遷郡刺史右千牛衛將軍仲諶可右監門衛大將
軍制

詩云振振公族夫能學問以知古文來以見志則可謂
有信厚之風習為善之樂矣爾等咸以經術待試有司
銓能程藝率有可取嘉其忘膏粱之佚安儒素之業宜

有甄賞以示旌別進秩加等是謂休寵益勵操守毋怠
初心

承議郎殿中侍御史上官均可兵部員外郎兵部
郎中葉祖洽可禮部郎中制

六曹屬郎朝之精選號曰頭司尤為重任春官之掌邦
禮祈父之主戎事決非美材曷當遶東以均祖洽器識
宏茂文彩瞻麗或恪職風憲或收譽臺妙宜有峻遷以
副衆望論其初試始被握蘭之寵銓此久次益見應星

之貴勉修職業毋負渥恩

金部郎中范鶚可京東轉運副使京東轉運副使
侯利建可金部郎中制

朝廷經費調度金穀為重內則文章地官之屬外則漕
臺使者之任非其深思敏智不足以當吾慎選以某久
更吏職綽著能譽惟此司存雖有中外之別至其職業
非復劇易之判易地而處陳力就列益圖善最以副民
望

兵部郎中杜常可光祿少卿祠部郎中尙宗旦可
兵部郎中太常丞賈易可祠部郎中制

六曹九寺所以挈提綱目釐舉庶務朝廷資以為治者
也屬部卿貳是為妙選有以久次增叙或繇良材初試
吾所簡閱未嘗輕付常風格幹濟陳力維舊宗旦樞機
周密應務敏達易儒學修明士論稱述此其在官皆有
休譽進而用之吾何愛焉武部掌兵伍之符籍祠曹主
中外之祀事光祿之任尤為繁夥非若漢代謹門戶之

禁而已其惟恪恭勤勤可以稱職汝其勉之

水部郎中王諤可知濟州都水監丞錢曜可水部

郎中制

臺郎重選郡守優寄朝廷待材用之宅兼仕宦之美是
皆雍容內外之望用為更互出入之地以諤劾官文昌
既歷歲月俾分符竹往臨鉅野以曜領護都水丞事修
舉進升省闈仍莅起曹勉副茂恩力圖來效

朝散郎守兵部郎中程博文可太府少卿承議郎

陳次升可兵部郎中制

太府主貨賄之藏司其出納夏官主五兵之要謹其符籍貳卿副郎皆精選也以博文綿歷省闈綽著士望以次升臨按淮甸克宣使指並用登進以攄材略夫其厠惟月之班聯應星之象為寵多矣爾其勉之

朝散大夫權知曹州王彥韶可衛尉少卿朝奉大夫駕部郎中張修可鴻臚少卿朝散郎蘇注可司封郎中承議郎太常丞周秩可駕部員外郎制

中都列官皆有分職地崇望高者卿寺郎曹也非其美材未嘗輕授以某等持身端直臨事詳敏外與州郡內更臺閣久次成效皆有可紀是用遞加寵進以極智畧或欣貳惟月或上應列星至于副郎並為茂選敬副寵光敦懋職業

前河北提刑王端可將作少監新差通判瀛州李敦頤可軍器監丞制

百工之事萃于二監將作謹於樸斲軍器嚴於補繕非

有程不可以稽其勤惰非精心不可以見其功鹽命官之重從可知矣以某刺舉時當以某會計明審推其有餘允宜繁使或丞或貳實皆寵命勉力自強以副推擇承議郎光祿寺丞王愈可太常博士宣德郎呂由庾可光祿寺丞承奉郎王旂可太常寺太祝制

九卿之屬効職輦轂皆朝廷之精選而養材待用之地也以愈學術通敏究知古今使為博士可以綜練禮文以由庾持身謹飭紹其家世使丞光祿可以欣助卿事

以旂幼壯好學傳其父書使為祝官可以陳信正辭並
承休命所思圖報

朝議大夫充集賢院校理諸王府翊善王汾可中
散大夫直祕閣差遣依舊制

大夫以上皆高爵也至于中散品秩益崇祿餼益厚吾
所以待材用之士其能自致此者鮮焉以汾敏學多聞
內行兢兢縣歷詞館久次王府有以自守事常裕如考
課當遷俾從明陟昔子雲叔夜偕在此官貼延閣通直

之選仍藩邸置醴之舊祇服休寵益思恪居

左司諫朱光庭可左司員外郎右司諫王覲可右

司員外郎制

朝廷開直言之路延諫爭之臣其能愛君主於信厚論
事識其大體不為苛察以取聲譽而補益之效粲然可
見宜有褒崇以顯尤異惟覲學問端邃臨事屢斷惟光
庭氣宇惇重見義不回並列二省有光七列文昌之為
政本都司之有屬郎尤思得人以齊衆務俾從遷秩復

使効才

新差京東轉運判官張景先可權發遣河北轉運

判官京東西路提刑胡宗回可京東轉運副使制

朝廷之任官必于其事乃可求其稱職為其達民情之
薄厚審吏材之高下而其舉措時當績用有叙也以宗
回詳按庶獄表率一路既有成效益宜重任俾持錫輸
之權用謹金穀之賦今河流未復隄繇方興商度功利
實賴智畧惟景先前在都水陳力有謀復付北道仍貳

漕事慎簡之意夫豈易哉各務悉心以副休寵

朝請郎權發遣宣州周之純可廣東提刑朝奉郎新
差福建運副張修可知宣州朝請郎權江西運副
王祖道可福建運判朝請郎淮南西路提刑蘇解
可江南東路轉運副使朝請大夫江東轉運副使
李莘可江南西路轉運副使制

商度金穀之盈虛詳按獄岸之中失使者之任朝廷慎
選蓋所謂將王命而明邦國若否者矣爾等咸以幹力

屢更繁使付之百城之富一道之寄或以初試銳精來
效或以易地習慣成事悉堅乃心廣集善譽惟修擢自
省郎出總甌越疾病自上黽勉勿任假其左符足資卧
治江南諸郡宣城為大敬服休命知其厚恩

朝請郎行太常博士辛廕可太常寺丞奉議郎權
判登聞鼓院劉唐老可太常博士制

太常禮樂之司博士議論所自參訂今古折衷內外非
宿儒成學不足以居以廕洎唐老文采質性見稱搢紳

和而不流毅而不固是用擢蓮秩宗之列專主曲臺之業勉服休寵益圖善最

太常博士充集賢校理孔平仲可祕書丞姚勔可
太常博士制

祕書圖籍之府奉常禮樂之司國家以待碩儒之士而養育其材非夫博辨通識溫恭守義未嘗得而居之爾等咸以德藝見稱搢紳銓能授官實宜其任易地而處亦為允稱勉自崇勵以副光寵

兩浙運判葉伸可權發遣轉運副使朝散郎鞠承
之可權發遣兩浙運判官制

總率一道澄察百吏金穀之繁黦獄訟之紛雜非精心
不能盡物非強力不能輯事惟伸奉使二浙綽著能效
不有旌擢曷以示勸稍正官號以重權委惟承之幹力
強濟心術開敏可以佐伸究其智畧同寅協恭夙夜職
業無隳前功益收來效

新差知越州張詢可福建轉運副使新除開封府

推官田子諒可河北西路提刑廣東轉運判官毛
漸可湖北轉運判官制

宣力四方為上耳目使者之任也金穀功名之會繁獄
岸鞠讞之大小非有敏智孰堪劇治以某等既更歷試
皆有稱譽並假節傳往明若否夙夜匪懈以酬寵數

太府少卿王子淵可權京西轉運使知北外都水
丞公事張景先可京東轉運判官制

陪京之地東西二道連城百千生齒鉅萬而民俗有齊

魯楚鄭之別物產兼桑麻魚稻之殊賦稅之入多寡不
類有司總其經費均其移用儉無蹇乏富或羨餘則不
孤委寄而稱良使者矣爾等皆以幹力久更器使是用
並假傳車各當一路其亦悉力徇公以集課最夫東人
經水潦饑饉之害必厚其粒食西方有萑苻追捕之餘
宜絕其桡肆欽哉惟時毋忝休命

宣德郎范鉞可知太康縣制

宰字之職風化所從在漢則三輔異選於唐則兩畿為

重今之旬服亦當慎簡以爾智術有餘足任治劇付茲
民社密邇輦轂承流所以宣布有善易於上聞其勉之
哉毋舍勤恪

朝奉郎吳沛可知開封府考城縣制

邦畿千里郡國之首縣令一同子男之政然王澤所布
莫近於京畿所向莫親於宰字是以銅墨之寄詔除惟
重爾以幹譽粵膺妙選其克精心慎事平獄察訟夙夜
無怠以集課最

通直郎孫述可知開封府長垣縣制

王畿千里縣邑綦布北道之出長垣居首冠蓋走集使
客踵繫銅墨之寄擇材匪輕用汝充選思所稱職毋怠
毋亟以協民譽

永議郎張亞之可知開封府祥符縣制

東畿屬縣十餘二赤居其首所以扶助尹正敦厚風化
令事重矣今以付某昔陸雲在浚儀民為立生祠雲文
士也而惠及此汝將勉之乎

奉議郎新差簽書鎮海軍節度判官廳公事章顯
可知開封府尉氏縣制

畿內諸縣古稱三輔之劇也兵屯所在尤號難治以某
久更宰字習知民務擢而用之宜有顯效思自奮勵以
副推擇

河北運副唐義問可河東運副兵部郎中程博文
可河北提刑制

瀕河之壤晉魏為大使者之任耳目攸繫九賦所充于

以給邦用五刑所蔽在乎折民情故將漕之寄察獄之
官朝所慎選人所輕授以義問屢宣使指居積民譽以
博文內佐浩穰夙效材敏是宜並假四封之傳往治百
城之富足食足兵下無愁歎庶獄庶慎法如畫一乃為
稱職汝敬之哉

權提點兩浙刑獄公事朝請大夫張安上可湖北
轉運副使權知潤州朝散郎楊傑可兩浙提刑制
朝廷疆宇濶遠所以存恤幽隱耳目之寄付之使者惟

興利除害于民務決平申枉于岸訟吾甚重之未嘗輕授以安上幹力強固智慮開敏荆楚之區襟帶蠻徼足食足兵漕事實嚴以傑儒學自修心術愈壯三江之濱民俗輕揚庶獄庶慎中興具存並付傳車之寵以當外臺之選思其恪居副此任遇

翰林醫官殿中省尚書奉御李永昌可權易使西
綾錦副使兼翰林醫官副使殿中省尚藥奉御卓
順之可軍器庫使翰林醫官殿中省尚藥御醫史

晉中可直翰林醫官局翰林醫官班漢卿可尚藥
奉御制

執技事上莫貴于醫惟其精心慎慮以輔其術則可以
動無不察期于十全矣爾等尚勞殿省陳力既久功效
顯著由是道也宜加遷叙以示褒進祇服休寵無怠素
志

朝散郎右司郎中杜紘可大理卿制

哀矜庶獄明清單辭所以一萬民之情蓋不出三尺之

律必得忠信之長明辨之士使之亭疑決平可以弼教
輔治矣具官某稟性通敏用心精詳能傳家學頗得法
意閱閱所載鞠讞為多宜付棘寺之治且正月卿之秩
服我光寵思所報効不犯于有司雖非爾力之所及自
以為不寬庶乎古賢之可學耳

大理少卿李鳴復除大理卿制

朕近觀勅令所編類舊典我孝祖宸筆逐事點勘增修
刪改曲當情法於恤刑之條尤加詳焉企慕不已因親

劄以示輕用徒刑之戒廷尉天下平可不遴擇爾表于
西州儀于王朝心夷氣酥藹然君子長者之風迺者俘
累之獄咨爾聽之簡稽得情契成以宥而朕好生之德
被于貉隸之徒達于窮髮之北良用嘉歎晉躋九列帥
屬棘廷使四方司政典獄咸知朕欽恤之意念之哉刑
期無刑以長我王國

權涇原路兵馬鈐轄皇城使萬州團練使張之諫
可轉兩資西上閣門使制

料敵制勝，懔威發謀，行陣之功，雖貴其訊。馘鎮守之重，實資其籌。畧懋賞所及，美秩奚恡具官。某勇驚絕人，寬裕得士，躬履戎行，分守私壘。近者羌人犯順，邊馬坌人，統帥部伍，猛銳齊奮，完固城壁，安堵無懼。深得治戎之要，宜膺禦侮之賞。上閣之峻，使聯維重，祇服休寵，益自勉勵。

朝散大夫韓宗師可衛尉少卿制

九寺輔治，長貳維貴。地崇望重，朝有定秩。雖事務差簡，

而材者是處以爾率身謹行臨事銳敏門廷之養稱於
士夫治可移官于何不濟以是命汝貳于衛尉祇服訓
詞亟成職業

前江西提刑宋彭年可司農少卿制

朝廷試吏於邦外用材於都內以其效智於彼者已信
則其宣力於此無忝爾往者詳刑奉使既結成課稍進
卿列俾貳大農督視倉庾謹察會計惟其勤恪無怠小
大必周則為稱職而知報矣爾慎之哉

朝請大夫直龍圖閣葉均可太府卿制

傳稱六官之長皆民譽也區區小邦用人若是況吾九
寺之重乎具官某心術通敏儒學兼劭早列詞館出試
政事持節剖符繇歷斯久率有可紀是謂老成宜進惟
月之班以觀竭節之效勉務彊力不孤寵遇

京東轉運副使李杲可太府少卿制

表率一道副貳九列皆朝廷之精選亦搢紳之美仕授
賞之際曷嘗輕哉爾素以吏幹見稱士論將漕之久終

更宜代惟太府之繁會實中都之要劇進聯惟月益佇
來效

奉議郎管勾機宜文字魏章可團練使制

師旅之行將帥以其精銳陳力于外幕府以其文墨論
議于內至于成功皆當懋賞今西師告捷爾豫有勞俾
進秩叙以示旌勸祇服休命益思來效

蕃官皇城使簡州刺史若沮沒移可遙郡團練使

制

軍旅西出將帥盡力深入深阻蕩覆部落焚燒橋梁斷絕要路爾豫當隊伍克奮精銳上功計獲足為戰多宜加懋賞以示勸獎增團結之寵名仍使聯之美號祇服光寵思所報効

宣政使嘉州刺史內侍省右班副都知劉有方可
遙郡團練使制

出入禁闥宣布內令樞機周密是其職業夙夜匪懈見其智慮歲月之久始終如一第其優最宜有遷寵增團

練之美名壯使聯之重望膺服優渥益思報効

皇叔武衛大將軍磁州刺史叔儺等並可遙郡團

練使制

環尹之貴拱衛天居開大將軍之幕府可謂盛矣而又
外領州符兼總使節徒以公族惇叙之愛得用歲月之
久而授之國恩隆厚思所報稱

試太學正葉濤可瀛州防禦使官監蘇州糴納倉
彭汝霖可並太學博士太學錄李格非可太學正

真定府真定縣主簿盧訢可太學錄制

太學賢士之闢博士正錄皆師表之任也非其經術修明內行峻潔不足以當是選爾等籍甚士林或已試庠序並從遷擢以究職業

太史局直長許孝恭可太史局丞制

陰陽之說拘而多忌拘則災祥之辨不可不究忌則時日之異不可不避爾執技從事自信其術魏王之葬指言其失不愼師法能屈衆論嘉其守官俾從增秩

皇叔祖保信軍節度使宗隱男仲覲等可並太子
右內率府副率制

公族之子屬近愛至未及有知膺受光寵非以祖廟之
隆慶朝家之惇叙耶副率之貴是惟通籍勤身戒事以
就長立

彭城集卷十九

欽定四庫全書

彭城集卷二十

宋 劉敞 撰

制誥

吏部尚書蘇頌等可並兼侍讀制

朕惟聖王之要道天下之義理著於竹帛之編傳於師
儒之論所以正身安人其術廣矣誠得直亮正固匪躬
之士數繹誦說日陳於前其為益者豈小補哉以某幼

壯好學者老成德以某天機深邃心術博通皆文足以
輔治辨足以周物宜備金華之選以詔虎門之嫩咸務
勤盡用副虛佇

宣德郎劉槩可祕書省正字制

學問修於身而朋友稱之士之美致也爾効智太學師
帥國子而近臣交口譽之其必有以信於士大夫矣蘭
臺屬官吾以養育賢士茲為清選今以畀汝毋怠初心
以永終譽

皇叔祖故昭信將軍節度使開府儀同司宗瑗可
贈太師追封崇王制

惇叙之恩蓋本於公族尚德之選亦通於外朝哀榮並
施隆殺有等地尊而屬近禮備而位顯矣具官某體麟
趾之德厚居磐石之宗強好禮而身修雖曰未學必謂
之學用嚴而家治施於有政是亦為政固已表儀宗室
光顯本朝奚修塗之未央而朝露之遽及惻焉傷悼何
恫如之稱情以文崇賁卹典龍袞襍服維師是以絕班

金路啟封非劉未嘗胙土併疏異數以光寔竇冀其有
知歆此休命

皇兄故右金吾衛大將軍單州防禦使令儼可贈
安化軍節度觀察留後追封高密郡王制

睦族之道莫不欲其貴富追遠之義又當均其存歿眷
予近屬宜有加等具官某賦性惇篤治身謹卓協麟趾
振振之美茈葛藟綿綿之盛內列環衛外領使符無祿
早世吾甚悼之俾崇卹典以示惇叙戎幕廉車之留後

連城大郡之封王是謂豐恩足光逝魄

故醴泉觀使武泰軍節度使贈開府儀同三司朱
伯材特追封恩平郡王制

保姓受氏享有死生哀榮之隆節惠壹名相其春秋寔
宥之事匪我近戚則維勲勞具官某生於高明輔以禮
樂小心而畏義強志而婉容用能維有歷年不失舊物
朕眷言先后追正儷極之尊永念繼文嘉乃有子推原
厥初聿圖王封適契朕志是用受茲青社壯威命於元

戎賜爾公圭享鎮撫之彝器褒此異數光于九原匪予
爾私其服朕命

大理少卿杜純可侍御史制

風憲之任總於中司中司之貳聯於御史是其繩愆糾
謬舉直措枉惟不吐剛不茹柔者乃充其選焉具官某
賦性端直臨義專固論法得簡稽之要祥刑協哀矜之
中使之要白筆之任居正色之地必去邪不疑惟力是
視推擇詳慎報稱實艱益務恪修以副虛佇

右司員外郎王覲可侍御史制

朝廷風憲付之臺率而侍御史為之佐焉吾欲得清直而信道忠厚而知體耳目元首繩墨衆材當是選者吾甚慎之具官某學敏才優忠勁有立前在諫省屢進謹言亟易都司仍有令譽是宜授豸冠之重居霜臺之貳夫繩違糾謬廟上率下貴以義動而不求苟勝務於心競而勿為朋進戒之慎之以副虛佇

祕書監張問除給事中制

左右侍從之臣率皆謹直輔上者也而給事中復以駁
正違失為職夫識非通達則觀物無節器非宏厚則守
善不固居是選者其亦艱矣具官某學術淵通幹力强
濟歷職中外敏懋不怠其譽已試所至可紀白首壹節
誠心無貳宜其備顧問於青瑣謹獻納於東臺庶幾羔
羊素絲之美直諒多聞之益副吾旁求爾其慎哉

監察御史韓川上官均可殿中侍御史制

執法憲府繩督在位言屢上而忠一無二氣逾勁而溫

厚不剝可謂有司直之風靖恭爾位者矣遷秩殿中實
崇位望益堅素守深著來效

祠部員外郎翟思可殿中侍御史制

御史之職皆耳目之寄至於殿中地益顯近今吾詔有
司以資歷用人為其已試則臨時不苟老成則責義有
準庶乎繩愆糾謬出於中正耳以爾前在憲府既有嘉
聞比歷他任亦克永譽而近臣之言尚其勁直復正中
臺之秩以當白筆之任勉力周務毋怠而志

秘書省校書郎盛次仲可集賢校理依舊制

圖書所藏聚于中秘校讎之官既為精選仍以歲月課最陞於麗正儒林之榮莫與為比惟敏志敦學可以稱之以某效官治已士友所稱擢茲寵命益思勤恪

朝請郎王彭年可監察御史制

百官皆以職事奉上而御史以執法為稱法者貴於當義而果平而不回膺是選者其亦難矣吾詔臺率舉其屬官臣覺等以爾來上吾樂得材良而試之又以觀近

臣之能慎守職業毋孤任遇

御史臺檢法官楊康國可監察御史制

風憲之任寄于中司使之升薦御史是為故事傳曰舉而所知其素在僚屬朝夕從事視其所以察其所安夫何庾哉用之不疑惟繩直之地白黑所判公則生明強則無撓勉思恪居以蘄休譽

朝奉郎充集賢校理趙挺之等可監察御史制

憲度者朝廷所以為治也犯之則為壞法御史得而糾

之法正則主尊節義者人臣所以事上也失之則為悖
德御史得而察之德修則俗厚耳目之官紀綱之最慎
選所屬莫如御史爾等以力學自立藏器待用士友歸
其美譽有司推為舉首風憲之任我其試哉詩云柔亦
不茹剛亦不吐書云無虐憚獨而畏高明本忠厚而輔
義毋刻覈而取譽是為稱職其戒之哉

皇叔右監門衛大將軍叔過故所生母董氏可縣
太君制

宗祀之慶推顯以及幽廣惠也貴其子以及所生厚本也矧公族近屬職在環衛慰其反哺之心錫以漏泉之澤名城大邑疏為湯沐黃壤有知歆此殊渥

右監門衛大將軍士香故父所生母和氏可安吉

縣太君制

公族內宗咸有爵秩而士香念及父之所生求得追賁願以妻之賜邑移為湯沐察其用心有足嘉者特疏縣封以光泉壤

郢州東阿縣尉孫彥卿母宋氏封壽縣太君制

黃髮兒齒壽考之隆天之所以福壽德善也吾聞聖人
後天而奉天時故吾於耄老率加禮焉至於九十者加
以爵號恩之至也爾年齡應格而子方小官今疏大邑
取其令名以昭逢辰之慶亦廣錫類之祉服我休寵益
修母訓

給事中顧臨可刑部侍郎制

明辨惟良所以折獄也哀矜勿喜所以察情也合是二

者乃弼邦教非夫忠信之長曷能稱其職濟吾事乎具
官某志慮開爽學術通敏見義勇於有為立身果於自
信試吏非一成效已著是宜付秋官貳卿之選當尚書
政本之重具克盡心廣裕用究刑成之美無或便文俯
仰而致枉撓之咎祇服寵命以底休譽

龍圖閣直學士蔡延慶除工部侍郎制

朕以尚書總擘天下之務而六曹之副地峻望崇自非
材略優裕事業已試者未嘗輕授也具官某質性通敏

智術宏贍頃自先帝驟膺器使贊書出命薦歷內外董
戎分閫率在西北文武兼允聲問逾劬使之當一官之
貳居四命之峻其有餘裕疇曰弗宜因龍馬之舊秩進
冬卿之近列勉服光寵終譽夙夜

皇叔故成德荆南等軍節度使守太尉開府儀同
三司真定尹兼江陵君荆王顥可贈太師尚書令
荊州徐州牧改封魏王制

春秋之義惟母弟得以屬通詩書所稱蓋叔父著其殊

禮國朝並建同姓惇叙懿親生榮沒哀厥有前訓備物
典策以寓永懷皇叔具官某稟秀淵冲毓材粹茂閱天
下之義理為宗室之儀表富而好禮貴則忘勢推惻隱
之心每隆於濟物廣孝敬之志用足以臨下河間之實
事求是東平之為善最樂是宜永為藩輔光贊本朝淑
命不融中道摧殞震悼傷怛何痛如之崇歛袞之舊典
追賜履之介寵進陟師垣兼官大錄九命作牧包南西
於二楚千乘啟封雄魏大於三晉於以循曲阜之前躅

繼睢陽之故事匪王盛德曷膺異數尚惟幽歆歆于顯
休

贈魏郡太君制

春秋之義母以子貴子由宗祀之均福母以追遠而永
寵貴在其中矣孝莫重於此焉具官某母氏積善在躬
鍾福覃後克有令子進居法從既啟湯沐之封足尉凱
風之念粵因慶賚更授雄藩資其魏大之名協乃繁衍
之祉尚惟幽歆歆此殊休

皇叔恩州防禦使仲隗所生母崇德縣太君李氏
可安康郡太君皇兄惠州防禦使令鐸母金城縣
君張氏可普寧郡太君制

朝廷緣子貴而廣愛每崇錫慶眷母慈而示報無間所
生粵因誕辰俾申懋典具官某母氏稟操端靜臨事肅
恭柔訓有加色養無爽湯沐脂田之賜既祚邑封雄藩
大郡之名益隆寵數祗膺優渥母怠欽承

皇伯右武衛大將軍渭州防禦使仲鸞等十人故

新婦可並贈縣君制

嬪于公族稱為良婦不壽而夭為可憫惻宜因夫貴錫之寵數名城大邑以為湯沐尚其有知歆此豐澤

故朝議大夫充寶文閣待制王臨妻天興縣君盛氏可封仁壽縣君制

稟粹幽閒挺操端粹承夫則家事嚴整訓子而母道慈篤既疎大縣以啟湯邑宜因大賚更易名城取其佳稱以協光寵

西作坊使杜諫左班殿直王賀三班差使王戟各
轉一資制

蠻賊蠆蜂也辛螫中人不可不除而爾等力鬪重傷有
足嘉者進官一等以合軍賞

藩官內殿崇班浪哆轉兩資制

捕鹵蕃寇身被金夷亟上首功勇加部族宜疏顯秩增
寵使聯祗服茂恩益圖來效

新差湖北轉運副張安上可倉部郎中制

地官之屬皆為劇曹非智能出倫不能勝任以某幹力
強立內外踐更推擇付之任遇非淺其思盡瘁以復恩
寵

文某可兵部郎中制

道著嘉猷德符清望必其幹力足以濟務智識可用為
儀居是選者其亦艱哉某吏最籍聞家聲休顯由京兆
之浩穰聯夏官之繁會已試之效既已可傳前將之績
亦云停候姑務彊又毋怠欽承

朝奉郎兵部員外葉祖洽可兵部郎中制

文昌郎位號為上應列星惟六品可以當之暮歲之後
得以任子朝廷待之厚矣豈特出宰百里之比乎爾以
文學政術得以臺選歲月之久資格宜進不移司馬之
聯俾正依烏之秩欽承我命益思自修

王安石可三司戶部副使張燾可兵部郎中制

考績三歲進官一等先帝所以勵羣臣也具官某秉哲
迪義有聲于時能勵厥修以宜官政序功增位其善厥

承

朝散郎致仕劉宗傑可落致仕比部郎中制

朝廷資材能以為治在幽隱者必取況於久吏舊齒義
所不遺以某課最已效時譽亦著而謝事退處便已而
已不佐公宗之務吾甚惜之是用還之司土之籍寵以
文昌之秩主計劇曹應星妙選思自勤勵副此恩渥

軍器少監郭茂恂除工部郎中制

百工之事萃于各鄉屬郎之選豈當輕授以某用心精

祥見事敏速歷試內外皆有可紀淹留歲月未嘗曠事
宜輟大匠之副進職起部之聯毋墜前勞益勉後效

侍御史杜純陞左司郎中制

都司憲府屬僚悉朝廷之劇選也是以統正百官整齊
六曹是皆耳目之寄易地而處豈有重輕之別乎以某
往在先朝嘗付詔獄信已不撓見稱士論是用寘委都
司之任欣助綱轄之事勉力夙夜以副慎擇

朝請郎陳維孫故母仁壽太君高氏可贈廣陵郡

太夫人制

父繇子恩以崇贈品妻藉夫貴仍進爵封寵章不間於
幽潛孝治用形於溥率具官某故母某氏母訓端淑家
事整修懿德沒而不忘後嗣蒙其餘慶宛在實行之列
慨如陟屺之懷屬宗祀之告成迨下泉而均澤宜賜小
君之號亟疏大郡之榮壤戶有知象服加寵

尚書右丞胡宗愈妻福昌縣君丁氏封同安郡夫
人制

朕選建材傑以為弼輔服章位著皆竣其寵所以優禮
賢者體貌大臣而況其室家之間輔佐內外夫榮於朝
妻貴於室義所當予有自來矣具官某妻某氏毓秀名
族作嬪君子躬璜珮自修之美有夙夜相成之道婉教
端叔休風專靜可謂具鵲巢之德是以賜魚軒之榮亟
擇名城粵毓要區備湯沐之百邑稱翬翟之七命用疇
懿實勉膺異數

楚州防禦使楚國公世恩可贈奉國軍節度使依

舊楚國公制

朝廷親親之愛隆於九族生有惇叙之典歿兼哀榮之數高爵重位以稱情理具官某地居近屬材實宗英樂為善而自修過纖介而無有奄至淪謝良用震驚沛以隆恩錫之愍冊啟軍牙以分鉞仍茅土而啟封尚維幽宥歆此成命

皇伯故台州防禦使仲綰可贈武康軍節度使追封崇國公制

生有惇叙之典歿存追賁之寵公族之恩於是乎愛至而禮備矣具官某地近屬尊材高志美膏粱不能佚其性永淵有以見其操雖躋膺仕未及修齡奄至淪亡特深傷悼併賜寵光以輝泉壤

皇伯祖故保平軍節度觀察留後克思可贈開府儀同三司追封昌國公制

生榮歿哀所以厚公族之愛宜賙與贈是以著有司之事然非令德曷膺異數具官某地近屬尊志修行備能

集信厚之善靡聞纖介之失資其表儀豐於祿秩軍牙
廉車之留務有以致之逝川朝露之莫返何嗟及矣宜
崇愍冊以稱悼懷開府視相印之重建國用公主之禮
告于陰泉歆此殊寵

皇伯故真州防禦使叔封可贈崇信軍節度使追
封遂國公制

朝廷之於宗室愛至而恩厚故生則有兼官之寵沒則
有加等之贈具官某資性端直治家堅正朝會賓贊之

禮未嘗有闕朕膳助祭之事靡或不共以是付之連城
示其禦侮奄至不淑茲用惻傷漢東大鎮建牙秉鉞左
屬名邦分茅胙土並為顯命併光幽壤尚其有知歆此
異數

承議郎直集賢院知齊州王巖叟可起居舍人制
載筆記言之任史官之別也必居心正直可以無私於
淑慝惟文采藻瞻可以專意於纂錄朝廷以是慎其登
選而異其進用矣具官某識遠而氣勁學博而言立前

在御史得蹇諤之譽出為劇郡成豈弟之政是宜參右垣之列當螭頭之直服茲光寵思所報稱

侍御史王巖叟可起居舍人制

朝廷求信厚之士進謹直之言取其進忠竭誠救失補闕為益之重其可量哉報其成效示勸來者具官某天機粹美器宇渾厚好是正直輔以儒學自頃擢居中臺職司邦憲智慮所及知無不為準已所加挺而無撓是宜疇其美志峻於任遇右史納言之職法從選掄之最

粵疏茂恩以示殊寵

西京左藏庫副使高遵固可閣門通事舍人制

上閣之職親近旒宸朝會賓贊謹於為容然非有功閥
不膺是選以某幹敏恪慎歷官有稱錄其成效真茲顯
列祇服光寵思所報稱

朝奉郎王復故父任刑部侍郎充天章閣待制贈
開府儀同三司公可贈司宜制

合宮既祀溥率蒙慶惠澤所加無間幽顯然非韞德在

前鍾福于後亦何能沾此優渥無愧泉壤也具官某故
父某歷仕前朝稱為令德高風不泯休譽藹然克有幹
蠱顯登閨籍褒贈之典實慰孝思已崇開府之儀更陟
上公之貴尚惟冥漠潛被光寵

阿里骨大首領抹征魚錢並可特授銀青光祿大
夫檢校國子祭酒兼監察御史武騎尉充本族副
軍主制

奉其國珍入修貢職歸義向化忠孝兼效宜有寵授以

示懷遠擢武爵之美號因部族之主領體茲茂恩益思
所報

皇太妃乳母趙氏可封掌贊夫人制

懷慈良之質躬燥濕之勤肇自文祿之初逮及椒風之
盛恩之所被德無不讎寵以婦官實隆邦教

贈故尉北海郡王宗勝妻平昌郡夫人李氏可進
封小國夫人制

麟趾之詩恩厚公族鵲巢之化善屬邦君列國名臣魚

軒象服用疇淑德不愆寵光故具官某妻某氏毓粹幽閒秉心直信勤女工之事不怠組紉佐君子之為每嚴璜珮啟湯沐之賜邑以極夫榮緣閨閫之休風更形治命求疏建國以報宜家俾增綸翟之華申錫山河之富既以彰內助之美并用慰重泉之心惠澤有加祇服唯謹

皇叔祖昭信軍節度使開府儀同三司漢東郡王宗瑗故新婦嘉興縣君彭氏可贈英國夫人皇叔

祖保靜軍節度使開府儀同三司建安郡王宗綽
故新婦平昌郡君鄭氏可贈榮國夫人制

宗祀覃慶溥及幽顯地近屬尊莫如公族位崇祿重矧
兼將相永惟敵體之義宜有漏泉之澤具官某故妻某
氏作嬪君子著德閨門窈窕可稱奄忽莫待俾進魚軒
之號仍疏大國之封尚惟陰泉歆此光寵

朝散大夫致仕魏縝弟朝請郎紳弟朝散郎綱弟
承議郎綸弟承議郎紹弟奉議郎綽故母渤海縣

太君刁氏可崇國太夫人故母新安郡君刁氏可
崇國太夫人制

夫榮於朝妻貴於室古之制也今使幽顯同之宗祀之
慶其為恩惠可勝道哉具官某等母某氏婦道柔順母
儀慈淑諸子之在仕版者朱紫紛然舉集門庭足為鍾
慶乃父既以追責進居公衮綸翟之贈宜及其配仍擇
令名以啟國封泉壤有知歆此殊寵

皇伯彰化軍節慶使開府儀同三司高密郡王宗

晟等故母康國太夫人孫氏可贈越國太夫人制
朝廷廣愛以崇孝故追遠者常厚多士念母而思報則
推恩而不遺矧其麟趾周宗鵲巢懿德不吝崇錫以示
光寵具官某等母某氏婦道端淑母儀聖善訓誨詒世
而可紀慶祉鍾後而無茂將相之榮萃於子舍山河之
祚大啟郡封而凱風寒泉之思未充孺慕象服翟車之
賜宜有加等俾即會稽之典以為湯沐之華壤戶有知
歆此峻禮

朝散郎監在京進奏院王伯虎復秘書省校書郎
制

為政之方未嘗不以振滯淹為事知夫良材難得而善
人弗忍也爾前以小疵失職累歲芥蒂疑似衆以為惜
技拭登叙以收來效還讎書之舊秩加中秘之新命益
自敦勵毋負優渥

秘書省校書郎李德芻可集賢校理依舊充校書
郎制

秘書外府麗正內殿圖籍之所聚集儒藝之所游處有志之士不以留滯為恨宿宮之人必用課最而進由外至內實為峻遷爾夙聯枝離繇茲歲月惟才與久皆當甄錄貼以職名未離舊守其以進用為榮而無留滯之念

朝奉郎試禮部侍郎陸佃可朝散郎制

以德詔爵以庸制祿朝廷所以登進材良次叙中外未嘗遺於疎賤而况於廷臣乎具官某文藻華絢器宇夷

曠直哉惟清是以典朕三禮婉而成章是以付之史筆
逮於考績綽著善最宜因寓祿之資叙進陟明之寵敬
服休命以永終譽

朝奉郎充龍圖閣待制王震可朝散郎制

考績之法所以磨勵多士乃自唐堯行之矣具官某文
博志修材優氣贍內參法從外領州寄民譽咸服吏課
處最有司舉歲月之效易以藉口本朝崇明陟之典亟
其詔祿俾從進秩用稱恪居

朝散郎權發遣建昌軍張升卿可叙朝散郎制

向者奉使嶺表鎮撫蠻服盜賊之發不能檢察奪官貶
秩退守私壘歲期當叙宜從牽復爾前以湔洗夙負既
遷陞逾舊朝之予奪纖介不欺今此新恩實謂加等既
被優渥思所報効

朝散郎王年可朝請郎朝奉郎宋湜祝康可並朝
散郎奉議郎王叔憲可朝奉郎宣德郎李世南可
通直郎承務郎大理評事錢蓋可承奉郎餘並如

故制

朕惟法令者所以為天下共也而繁文苛請日至月增
不憚刊改以求其中爾等俱以美材而應慎選則筆則
削用成新書疇其恪居推以懋賞進階一等是為渥恩
承事郎王仲煜可宣教郎承務郎孫樸可承奉郎
制

恩令之下溥及在位如雷雨之於百穀草木無不甲坼
者豈以其微小而遺之哉爾等預列纓裳齒于元士膺

茲慶澤例進秩叙勉崇立志用對休命

賜同進士出身右班殿直子湜可換承武郎左班

殿直令翻可換承奉郎制

國家開設科選詳求才諳能者取之無間疏逖矧爾麟趾公姓天潢餘潤不以膏粱自佚而用經藝修已因其程文賜之名第俾遷優秩爰齒多士方今惇厚邦族誘進初學故其課試之法異於寒素至其効官將責實用勉爾勤慎以集体譽

承議郎充秘閣校理權判登聞鼓院張舜民可通判虢州制

前以御史言事不合朝廷優容直臣未嘗備責故移位他局仍在轂下而舜民力自推謝又以其多病及家婚娶求得自便天道從欲而有曲成吾何恡焉虢畧要郡率貳維重祗服恩寵毋怠勤恪

吏部侍郎胡宗愈可御史中丞制

權衡之於輕重繩墨之於曲直由其無私而素具是故

應物而不貳朝廷風憲之任忠謹之士亦所以素具而待列位也命官之艱得人惟允具官胡宗愈秉心端直為學深厚粹然特達之姿淵如有容之度粵自潤色綸省獻納瑣闥副貳天官藻鑑多士綽有休譽舉為稱職是宜付中司之權寄執法之柄爾其修胸中之誠應方來之務有節於內則物無不察以義自處則動無不中稱此茂恩著為顯效

彭城集卷二十